



Fundasaun Mahein (FM), 05 Feveireiru 2025

Komunikadu Imprensa

Delegasaun Kompeténsia sira kona-ba Servisu Nasional Intelijénsia ba Ministru Prezidénsia Konsellu Ministru: Analiza ida kona-ba Ierarkia no Legalidade

Fundasaun Mahein (FM) fó sai ba públiku ninia análise kona-ba Despaxu N.º 01/PM/1/2025, ne'ebe hasai hosi Primeiru-Ministru IX Governu Konstitusional, ne'ebe delega kompeténsia sira relaciona ho Servisu Nasional Intelijénsia (SNI) ba Ministru Prezidénsia Konsellu Ministru. Desizaun ida-ne'e, foti iha loron 20 Janeiru 2025, hamosu debate signifkativu sira kona-ba kompatibilidade hosi delegasaun ho provizaun legal sira ne'ebe regula SNI.

Iha ne'ebe Lei N.º 9/2008, loron 2 fulan Jullu, ne'ebe estabese Sistema Nasional Intelijénsia, determina, iha n.º 2 artigu 13, katak "SNI hanesan servisu públiku ida ne'ebe depende ba Primeiru-Ministru no goza autonomia administrativa no finanseira". Dispozitivu ida-ne'e destaka pozisaun sentral Primeiru-Ministru nian nu'udar autoridade aas liu ne'ebe SNI hala'o operasaun diretamente. Nomós Dekretu-Lei N.º 3/2009, loron 15 fulan-Janeiru, iha n.º 1 artigu 2, reforsa katak SNI nu'udar "servisu Estadu nian ne'ebe personalizadu ne'ebe depende diretamente ba Primeiru-Ministru no goza autonomia administrativa no finanseira". Kuadru regulamentar ida-ne'e garante independénsia administrativa SNI nian, hodi prezerva nafatin ninia subordinasaun ierárkika direta ba Primeiru-Ministru, hodi garante kontrolu estratéjiku ba ninia atividade sira.

Maibe, Despaxu N.º 01/PM/1/2025 ne'ebe delega kompeténsia sira relaciona ho Servisu Nasional Intelijénsia (SNI) ba Ministru Prezidénsia Konsellu Ministru. Nune'e, FM subliña pontu xave sira tuirmai kona-ba desizaun ida-ne'e:

1. Transparénsia no Fiskalizasaun: Esensial atu garante mekanizmu klaru hodi monitoriza atividade delegadu sira, asegura katak sira aliña ho objetivu seguransa nasional.
2. Ierarkia no Responsabilidade: Enkuantu delegasaun legalmente permite, Primeiru-Ministru nia fiskalizasaun estratéjiku tenke mantein atu prezerva integridade SNI nian.
3. Interpretasaun Jurídika sira: Diferensa interpretativa kona-ba limite no objetivu delegasaun nian bele hamosu konfliktu jurídku no administrativu, ne'ebe presiza rezolve ho klareza no diálogo.

FM rekomenda atu implementa mekanizmu fiskalizaun ne'ebe rigorozu hodi garante katak delegasaun hala'o ho transparénsia no akuntabilidade. Liu-tan, sujere atu governu komunika ho klaru kritériu no objetivu sira hosi desizaun ida-ne'e ba sosiedade, hodi promove konfiansa públiku no aliñamentu ho prinsípiu demokrátiku sira.

Atu hetan informasaun liu-tan kona-ba análise ida-ne'e ka atu asesu ba relatóriu kompletu, favór vizita ami nia sítiu ofisiál: www.fundasaunmahein.org.

Kontaktu:

Fundasaun Mahein (FM)

Email: mahein2009@gmail.com

Telemovel: (+670) 75771766